

coligadi per il cristianissimo re di Franza in la liga fata con la Signoria nostra:

El nostro santo Padre el papa, et la Chiesa romana, l'impero, et li principi lectors di quello.

Li re di Castilla, de Ingaltera, di Scozia et di Portogallo, di la Marcha, et di Novara.

L'archiducha di Austria, el Gran maestro et religione di Rhodi.

El ducha di Savoia, el marchese di Monferà, el signor Constantin come suo tutor et governador.

Le anziane lige et cantoni di Alemagna apellade comunemente sguizari, et quelli di la Grisa.

Et simelmente i fiorentini.

A di 8 avosto. Fo per la Signoria nostra nominati questi per soi coligadi:

El papa Alexandro, et la santa romana Chiesa.

El Serenissimo imperio, et li principi electori di l'imperio.

Il re di Spagna, et regina di Anglia, Hungaria, Polonia, Scozia, Portogallo, Navara, et Dacia.

Archiducha di Bergogna, cardinal gran maestro di Rodi, ducha di Savoia, ducha di Pomerania, marchese di Monferà, et signor Constantin.

Li anziani di la lige, et cantoni alemani elvetii, et liga Grisa. Il ducha di Urbim, la comunità di Anconona, Lucca, signor di Rimano, prefeto conte di Sinigaja, signor di Brenzan, conte di Pitiano governador nostro, signor Carlo Orsini, Bortolo d'Alviano con tutta la caxa et conti di Lodron.

A di primo avosto. In collegio non fui perchè andai a la villa di Maerne per do zorni; et si mudò tre consejeri, et introno sier Lucha Pixani, sier Antonio Valier e sier Andrea Gabriel; et cai di LX: sier Hironimo Guoro, sier Zuam Duodo et sier Alvixe da cha da Pexaro di sier Fantin.

Fo leto lettere, el sumario sarà notado di sotto; et fo balotato uno scontro dil pagador, va in campo, fono tolti 6 et rimase Secondo Trivixam et fu sotto Josaphat Rizo fradelo di Marco Rizo.

Da poi disnar fo pregadi; e fo messo parte, per li savii dil consejo e di terra ferma, che havendo richiesto el secretario dil conte di Pitiano per nome di esso conte a la Signoria nostra 100 homeni d'arme a suo fiol, è a soldo con senesi et ha homini 40, et a certi soi nepoti, atento la promessa *alias* li fu fata, che volendo la Signoria nostra el cavalechi, darli 100 homeni d'arme di più, per tanto che li sia dato questi 100 homeni d'arme al ditto suo fiol et nepoti.

Item, provisionati 100 per guarda di la persona di esso conte, e have tutto il consejo.

Fu posto, per sier Luca Zivriam e sier Filippo Trum procurator savio dil consejo, che tutti quelli volevano dar altratanto dil don, era sta tanxato per li X savii, debino esser fati creditori de tutta la quantità, a restituirli poi, et habi il don di . . . per 100, et all'incontro el resto de savii messeno che fosse donato *solum* a la Signoria nostra quella parte saranno tanxati in don. Et parlò in favor di questa opinion sier Nicolò Foscari savio dil consejo; li rispose sier Filippo Trum procuratore, poi parlò sier Beneto Zustignam savio a terra ferma: e andò le parte 60 dil Zivram consejer e dil Trum savio dil consejo, 130 li altri savii, e questa fu presa.

Fu posto, per li sopraditti savii d'accordo, di mandar a dir per uno secretario a l'orator dil ducha di Milan vadi per tutto domenega via, et have 33 di no 144 di si, et cussi fu mandato Bernardim di Ambrosii la matina a dirli questa deliberation, el qual orator si preparava dicendo veria a tuor licentia dal principe, et fo ordinato per la Signoria a li avogadori di comun e ai cai dil consejo di X mandasseno li ufficiali et barche a zerchar li burchii per li contrabandi.

È da saper, li oratori di Franza provato li 100 ducati se li deva al mexe non bastava per le spexe, mandoe a dir non voleano più danaro da la Signoria e *tandem* fo adata la cossa per sier Hironimo Zorzi el cavalier che de intrade per l'oficio di le raxon vechie se li faria far le spexe; et pagerasse l'hostaria a Padoa dove sono li soi cavali.

A di do ditto. In collegio. Non fu il principe. Vene domino Jacomo da Nolla secretario dil ducha di Pitiano, et li fo ditto per sier Polo Barbo consejer la deliberation de eri, li piacque assai; et quanto al bando di quel Polonio di Boni vengi per via di gratia e si farà, e zercha il fiol dil principe di Salerno per le jumente, si farà.

*Da Padoa, di rectori, di primo.* Come a hore 22 era zonto li sier Marchio Trivixam et haveano provisto subito de' cavali.

*Da Montagnana, di sier Francesco Barbaro podestà, di ultimo.* Come havia fato la description di homeni da fati, et sono in la podestaria homini 1460 disposti e volonterosi di andar dove vol la Signoria, ben è vero non sono forniti d'arme, et si offerisse.

*Da Lignago, di sier Alvixe Capello capitano e provedador, di ultimo lujo.* In risposta di biave si traze dil veronese, farà suo forzo, etc.

Vene domino Hironimo Gajoffi per nome dil si-